

國朝耆獻類徵初編卷三百七目錄

將帥四十七

阿郎阿

九十

吳廷剛

明泰

阿迪斯

吉蘭泰

關騰

辭大烈

彥吉保

華聘

國朝耆獻類徵初編卷三百七

通奉大夫前署江西巡撫江西布政使司布政使湘陰李桓輯
將帥四十七

阿朗阿

阿朗阿瓜爾佳氏滿洲正紅旗人四川駐防乾隆三十三年由馬
甲隨征緬甸三十六年大小金川不靖大兵進討阿朗阿隨征三
十九年副將軍明亮分兵攻什扎古連克木城石卡阿朗阿等奮
勇鏖戰受槍傷穿頂得 旨獎賚四十五年大軍征三暗巴賊番
四十六年大兵勦甘肅逆回阿朗阿皆與焉五十三年廓爾喀擾
後藏 上命成都將軍鄂輝等督師申討廓爾喀旋退師乞降阿

朗阿以在事出力署驍騎校五十五年補鑲藍旗驍騎校五十六年廓爾喀復犯後藏境隨成都將軍成德攻剿聶拉木官寨及防堵各處隘口均有功尋遷防禦嘉慶元年湖南逆苗吳半生等滋事阿朗阿隨成都將軍觀成等進剿苗匪蕩平適川陝楚教匪踵起滋事移師剿捕阿朗阿仍隸觀成軍二年遷佐領三年大軍圍賊於大甯之老林園逆首陳崇德沿山築卡拒守甚堅會賊黨白登科來降言賊食將盡若閒道進攻巢穴可破觀成等令登科前導檄阿朗阿以兵繼之分爲四路冒雪進攻連奪木卡殺賊數千人四年賊首冷添祿竄至岳池阿朗阿隨建昌鎮總兵劉君輔追躡及之悅來場適參贊大臣額勒登保以兵夾擊斃賊數千斬首

逆冷添祿捷 聞 上以阿朗阿節次出力賞戴花翎十一年升
協領十八年陝西岐山縣三才峽木廂匪徒因饑煽亂 上命成
都將軍賽沖阿帶兵往剿十九年正月賊渡漢江將偏川境阿朗
阿隨賽沖阿自西鄉兜剿篝火夜行越山至木竹壩適賊眾自老
漁壩竄至據山梁抗拒賽沖阿督阿朗阿等直前衝擊擒僞元帥
楊榮盡殲餘黨復因別股賊匪數千由太陽灘渡過漢江南岸在
渭門童家溝一帶滋擾阿朗阿隨賽沖阿折回追剿馳抵碾子溝
賊黨踞險抗拒我師由間道夾擊敗之殲馘賊匪四百餘名擒賊
目數十人尋隨賽沖阿渡江追躡紅綠號各股竄匪敗之於洋縣
店子河擒殺七百餘人賊眾奔潰復敗之於賽家山擒僞總兵羅

懷等賊眾旋平三月擢荊州副都統七月卒子祥瑞驍騎校

右 國史館本傳

九十

九十張佳氏鑲黃旗滿洲人由健銳營前鋒於乾隆三十八年隨定邊將軍阿桂征金川勦趙拉促浸有功四十年升額外前鋒校賞戴花翎四十一年補前鋒校四十五年升委前鋒參領四十七年授副前鋒參領四十九年隨陝甘總督福康安征勦石峯堡逆回五十一年授陝西提標右營遊擊五十九年擢甘肅平羅營參將嘉慶元年湖北敎匪滋事陝甘總督宜縣檄至西安一帶勦捕三月勦賊首王全禮等於湖北鄖西之泥河口復於雞冠寨孤山大寨用火攻斃賊無算生擒王全禮等四十七名尋同領隊明亮赴襄陽樊城堵勦六月擢莊浪協副將孝感縣賊匪屯踞胡家寨

九十帶兵駐涇川鋪乘賊撲營時山岡棚座空虛衝擊之賊潰奏
入賞給扎布棟阿巴圖魯名號七月鍾祥縣境內賊匪屯聚官
兵分路進剿八月賊犯土門衝營卡九十等奪據前面山岡截斷
賊勢傷斃甚多二年襄陽賊首黃號齊王氏姚之富王廷詔白號
高均德藍號張漢潮等爲楚省官兵偪入川省十一月至桑樹灣
西安將軍恆瑞等分路進攻賊潰分投西南山梁九十從旁截其
去路斃賊多名四年四月甘省白號賊匪分股北竄官兵由東北
向西南堵剿九十等由二郎壩獅子川洩水溝諸要隘帶兵分堵
六月藍號賊匪在階州文縣一帶游奕恆瑞令九十駐紮寶珠寺
扼其要路賊匪復由廣元折回陝境竄至南鄭向東奔九十由銅

廠一路緊躡進剿至彭壩殺賊六十餘名八月賊首張漢潮股匪竄至江口玉皇廟一帶九十馳往關嶺等處堵截十月張逆就戮餘匪在大建溝等處屯聚官兵分路攻之九十等由黃柏園進剿賊匪肆竄殲斃多名十二月蒿溝之賊竄至大壩經官兵進剿向嶺南嶺北西竄九十馳至灰峪林殺賊八名生擒十一名五年正月川匪竄至隴州清水秦安縣境內滋擾官兵分三路進九十偕副都統扎克塔爾等爲右隊馳至隴山鎮由右進攻搶上山梁賊潰亂殲斃無數四月擢甘肅西甯鎮總兵五月襄陽黃號伍金柱股匪奔銅錢窖九十等率領兵勇由太平寨山梁抄赴石子嘴會官兵馳剿殲斃賊匪龐洪勝及餘匪千餘名生擒五百餘名白號

賊首張添倫黃號賊首辛聰由二郎壩西竄老山九十帶兵緊追擊之於五里坡斃三十餘名各股賊匪先後由棧道入甘九十等分頭搜捕又從柘栗園白營寺出棧道之草涼驛黃牛鋪等處會合官兵陝省餘逆搜捕淨盡復趨三岔山進剿賊匪向東趨欲奪路從棧道出九十等於東河橋堵剿十月辛聰等匪竄至沔縣地方經略額勒登保派九十偕副都統綸布春馳往堵剿白號高二馬五等前股賊匪經官兵攔回陝境向五郎壩中壩逃逸後股賊匪竄至西鄉之法寶山楊家河倚山屯紮陝西巡撫台布奏將新到粵兵交與綸布春九十等專辦西鄉賊匪八月與總督楊奎猷夾擊小股賊於蔡壩斃四十餘名生擒十餘名賊奔歸大股九月

徐添德股匪撲雙河溝口營盤官兵擊之追過金河口九十偕恆
瑞綸布春擊斃賊百餘名翻越兩重山又斃八十餘名生擒唐國
安等三十七名十月在嶮口板斃埡峽口諸處堵禦又防守瓦子
溝七里壩江岸六年正月駐紮鍾祥溝在西鄉西南一帶堵剿二
月高二馬五賊匪爲官兵追剿至後藏匿老林九十由舊司河進
剿斃賊三十餘名生擒二十餘名又追截之於南岔松坪六月太
平黃號賊唐明萬股匪竄入西鄉平樂鹽場九十督兵剿之八月
襄陽白號高見奇等股餘匪藍號冉學勝所賸零匪經川省官兵
追剿屢窺南鄭城固邊卡九十等派兵嚴堵不使闖入又在沿江
一帶分堵安康洵陽平利零匪九月由白雄關截擊倒水峒竄匪

殲擒三十餘名七年二月勦零匪於二道坪八年三省教匪肅清
經略額勒登保議奏凱撤事宜仍各畱本省兵勇分路搜防令九
十帶兵一千名駐紮龍池場督搜分水嶺中山廟油盤垵三處十
年四月帶領西甯全隊官兵回任十二年正月偕刑部侍郎貢楚
克扎布赴循化貴德廳查拏沙布浪等族搶劫青海蒙古牲畜之
賊番拏獲多名二月賊番竄巴思峒一帶率兵追捕六月復擊之
於什噶干至章纏腦斃賊五十餘名生擒十三名奪獲牛馬羊隻
以萬計九月回兵十二月丁母憂十三年四月回旗是月授直隸
正定鎮總兵十六年四月 諭曰九十從前曾在軍營於操練一
切尙能認真著調補福建建甯鎮總兵十月擢廣西提督十九年

八月卒子經文泰見任鑾儀衛整儀尉

右 國史館本傳

吳廷剛

吳廷剛四川成都人由行伍拔補把總乾隆六十年黔楚逆苗滋事調赴軍營隨閩浙總督大學士福康安節次打仗攻奪納共山貴道嶺長吉山等處有功 賞戴藍翎尋升千總嘉慶四年升四川漳腦營守備八月隨經略額勒登保剿達州青號教匪王登廷等於青龍坪身受矛傷 賞換花翎五年二月擢茂州營都司閏四月襄陽白號賊匪楊開甲黃號辛聰等股合夥欲從龍駒寨奔赴河南廷剛隨侍衛色玉慎等率馬步官兵鑢道掩擊賊眾方圍輝塔寨洞寨官兵衝入痛殲之餘匪奔竄五月黃號賊匪伍金柱等眾在手板崖廷剛偕都司桑漢帶兵勇往探適與賊探相遇廷

剛等密伏樹木突出殲斃之馳報大營派兵追擊先後斃賊七百餘名生擒一百餘名奏入 上嘉之六月楊開甲等股匪焚掠茅坪廷剛率兵進擊斃騎馬賊十餘名八月追白號賊首張天倫及辛聰各匪至馬桑壩適高二戴四掌櫃股匪在箭杆山衝出廷剛等率兵勇擊之斃賊三百餘名生擒八十餘名賊潰官兵沿途剿殺又斃賊一百餘名生擒七十餘名尋擢貴州提標前營遊擊六年五月官兵擊張天倫楊開甲等五股賊匪於高唐嶺賊分路竄廷剛等由陳家河進越皮家河斬獲四百餘名七月偵知襄陽藍號賊匪冉學勝與張天倫股內另匪合竄至孫家坡廷剛乘夜追躡黎明及之斃賊甚多賊大潰八月張辛等逆向中壩子西竄冉

學勝又由大蜀鴉河北竄廷剛帶步隊翻界嶺截擊偕副將楊芳等於廟子壩設伏斃賊二百數十名復追十餘里斃賊一百餘名生擒余開古等六十餘名張天倫股匪由關垵南竄廷剛等躡之賊過河抗拒廷剛等奮力仰攻搶上山頂殺賊五六十名滾崖跌斃者數十名棄械跪投者七十餘名尋擢四川永甯營參將襄陽白號賊匪高見奇姚興佐等竄入通江境內官兵分途追剿山徑紆險棄馬步行見賊匪數十人擁一賊奪路走廷剛率兵勇追擊之乃首逆辛斗也九月通江藍號李彬股匪千餘人乘夜東走廷剛等追至熊家灣山梁賊翻山我軍橫衝上斷賊爲二廷剛追殺前股其後數百人回竄適後隊到廷剛等折回來擊之斃賊二百